

2 Timoti

Agau e nugau zebigeg

Pol nug Yesus nugau ze emgasagan duailel abai marai darena, go Rom ban uzan hiacaranem zau oug hemen. Go go ebu dai dai, gonugau noumabun ziwaz zumau dabeleimai, go koli Timoti guzenai sikut wai moroun, “Timoti, na izal salau zai, igual oiagab Yesus en sag petak emun. Na Uwait nugau Ze duailel subantal abai maramam. Gaul ze ipal nait dabeleu eiman i awaren. Uwait nugau duailel ipal uhu banou oi darem, na suban isanaramam. Dudu ipal agen Uwait semuranem, na agal igul i sesamoren. Dudu go aiu ses Uwait nug unum eg maramau.

Timoti, na iza sul daiba, nait ounab Yesus en petak emen go i uten, gusig mai daiba, uhu oi daiba, Uwait nugau duailel suban gumarai damam.”

Agau e sesamorabun ze

1:1-2 Pol nug Timoti ougab siksikabun ze aureun.

1:3-7 Pol nug Timoti nugau ougab petak eun en ‘Ese-e’ aureun.

1:8–2:13 Pol nug Timoti guzenai aureun, “Polumanemen dudul ipal go ze ata atai macanemen agen na uhu asiul mizamam, gonun, na mu asiul umam, bo, na Uwait nugau Ze subantal duailel abai maramam.”

2:14-26 Dudul igul naliu mui goagen ig abai migebl, dudul go ag Uwait nugau salaul du.

3:1-9 Yesus nug alabun ziwaz ebul duailel agal zigulin go araog usalamaul.

3:10–4:5 Pol nug Timoti gonugaul salaul suban mabun aimai aureun.

4:6-18 Pol nug gonugaul noumabun ziwaz en ze meun.

4:19-22 Pol nug Timoti nugaul ougab siksikai dabun ze ipal auraimai, ‘Kero’ aureun.

Pol nug koli Timoti sikut wai moroun.

1 ¹Iz Pol, iz Yesus Kristus nugaul ze oi aidanem du. Uwait nug gonugaul dabeleu eim iz tapai mileun. Go nug duailel ag Kristus en oiagab petak emen, muzmuz awaul dabun gusig marabun baib mareun. Go iz ze go duailel awarabun palautileun.

²O Timoti, na izal nagwai sul, igual oigeb Uwait tutak en memun. Iz na en alizem. Igual memenig, Uwait mui, igual Dubanou Ban, Yesus Kristus mui, agen nait ounab selai dabun mizeimai, na en bisom peimai, goagal oiagab naliu eiman na isanizamam.

Pol nug Timoti gonugau ougab petak eun gusig patai dabun aureun.

³Izal embigeg agen Uwait nugau igul suban sesamoranemen sul, iz han guzental sesamoranem. Guzenaimai, izal dabeleu enai, iz gonugau ameg ebu ze tamacag. Iz amban, umaum na en dabeleimai, Uwait ‘Ese-e’ auranem. ⁴Iz na utizai alemin ziwas ebu, nait weinemen amen il pemin en koli dabelem, gonun, na koli peizabun oiab dareu. Iz na peizaimai, izal oiab siksikamau. ⁵Na ounab petak emen go getal nait iman Lois mui, anan Iunis mui agal oiagab petak emen sul guzenem. Iz goagal igul koli dabeleimai, iz abiu goagal oiagab petak gusig memen sul igul go na ebizab han dareu. ⁶Gonun, iz nait dabeleu koli asai mizemina, gusig go Uwait nug na mizeun ab go huanem sul, na koli salau murabun aizem. Izan nait gagalin patena, na gusig go omen. ⁷Uwait nug ig uminabun wes migab tam. Go Ah Wes migeun. Gonug ig gusig migena, ig duaille ipal en igual oigeb noumaimai, igual dabeleu iguatal suban gumabun iboin.

⁸Guzenaimai, Timoti, na igual Dubanou Ban nugau ze duaille awarabun i uminen. Na duaille iz en izal zai awarabun i uminen, einen, iz igual Dubanou Ban en hiacaranem zau oug darem. Na Uwait nugau gusig oimai, gonugau Ze Naliupet awarai aidaimai, iz ibail ereg uhu umam.

⁹Uwait nug ig igual igul eg ebuan imaigeimai, ig gonugau duaille naliu pet dabun uligeun. Ig igul naliu memun en imaigab tam. Gonugau dabeleu eim gonugau ougab naliu eim ig gaul isanigeimai, ig en ougab bisomig peimai, igual igul eg ebuan imaigeun. Getal go em usalai mab tam ebu, gonugau ougab naliu eiman Yesus Kristus nug ig isanigeimai, imaigabun dabeleun. ¹⁰Bo, ulis, ig imaigabun du, Yesus Kristus nug alina, igul go araog zoun. Gonugau salau nug noumabun igul zilacoroun. Gonugau Ze Naliupet eiman go awau muzmuz dabun igul araog meun.

¹¹Uwait nug iz gonugau Ze Naliupet duaille awarabun mui, gonugau ze oi aidabun mui, abai marabun mui, tapai mileun. ¹²Gonun, iz uhu banou wanem. Bo, iz uhu go gamacabun i uminem. Einen, du go en izal oiab petak eun iz go abiu. Iz han abiu go nug salau go iz ebeab meun, go nug go suban gumaneu. Salau go muzmuz damau, guzental, bete betei gonugau alabun ziwas zumau.

¹³Na ein Ze Naliupet izal oisau ebuan omen, na ze go domen guzental duaille igul naliu guzental awaramam. Guzenaimai, na Yesus Kristus dual pezai daimai, nait ounab go en petak emen gusig pataimai, duaille ipal en ounab noumamau. ¹⁴Uwait nug gonugau Ze Naliupet getal na

mizeun, go na suban gumamam. Guzenemen, Ah Wes igual oigeb oug dareu go nug nait salau gumabun isanizamau.

¹⁵Na abiu Kristen duaille ag Esia agaig ebu daremen, goagen unum iz semilei wanemen. Pigelus zaug Hermogenes dual han iz semilei wanemen.

¹⁶Iz Onesiporus gonugau ug abai ag en Uwait Ban auranem. Ziwas umkoskos Onesiporus nug iz isanilaneun. Iz hiacaranem zau oug darena, go iz peilabun aiu nuab tam. ¹⁷Bo, go Rom ban uzan alaimai, iz peilabun gusig itanilei itanilei, betei peileun. ¹⁸Iz Uwait guzenai auranem, aiu ses duaille sisiarabun ziwas ebu, Dubanou Ban nug go en bisou peimai, isanuramau. Na abiu go petak, iz Epesus uzan darena, Onesiporus nug iz umkoskos isanilaneun.

Timoti go malai du naliu damau.

2 ¹O Timoti, na izal nagwai sul, na Yesus Kristus dual pezai damen, go nug gonugau ougab naliu eiman na isanizaba, na umkoskos gusig tapai damam. ²Na duaille agal ameagab ebu izal ze abai maremin na domen, na han ze go sag dudu ipal igul naliu macanemen awaremen, goagen han duaille ipal abai marabun iboin.

³Na Yesus Kristus nugau malai du naliu daimai, gonugau salau eiman na ig ibaig ereg uhu gamacamam. ⁴Na abiu malai du go gonugau gumaneu du banou nugau ougab naliu usalabun sag salau muraneu. Go salau ipal mui ereg i wacaneu. ⁵Igul go sul, du in go gurgurabun, go gurgurabun kasai ze doimai, suban i sesamoramau, go gurguramau, bo, ecesab i umau. ⁶Du in ougem salau gusig macaneu, du go, go sag go amegai ougem go ebuan ee umau. ⁷Iz ze go aizem na go en suban dabilamam. Dubanou Ban nug dabeleu naliu mizena, na ze go domen nugau bigeg unum abiu mamam.

⁸Na Yesus Kristus en dabilamam. Go Devit nugau ug ebuan. Go noumaimai, koli waseun. Iz Ze Naliupet go duaille awaranem. ⁹Iz Ze Naliupet go duaille awarai aidarena, dudu ipal agen uhu mileimai, zob du sul hiacaranem zau oug heilemen. Bo, Uwait nugau Ze hiacaranem zau oug dab tam. ¹⁰Gonun, izaseu izal oiab gusig maimai, Uwait nug gonugau duaille tapai mareun isanarabun uhu asiu pet wanem. Iz uhu asiu go omin duaille asiu Uwait nugau Ze Naliupet dobi, Yesus Kristus nug imaraba, ag koli i noumamamen, ag awau muzmuz Uwait nug dual damamen. ¹¹Ze e petak pet.

Ig Yesus dual ereg noumaimai, ig han go dual ereg awau damam.

¹²Ig gusig tapai daimai, gonugau uhu omun, ig han go dual ereg duaille gumaramam.

Ig go semoromun go nug han ig semigamau.

¹³Ig go dual gusig ze baib maimai, ze go i sesamoremun, go nug gonugau baib meun ze sesamoramau. Einen, gonugau ze ananeu, go utabun iborain tam.

Salau du go Uwait nugau ameg ebun naliu dareu gonugau igul.

¹⁴Na ze e aizemin koli koli duailen awaramam. Uwait nugau ameg ebun na gonugau ze naliupet en i ze alalan aimai awaren. Ag ze alalanamen, igul go nug ag isanarabun sul iborain tam. Duailen inen go alalanemen ze duanemen, ze go nug agal hobo dabun igul eg maramau.

¹⁵Uwait nug na en ougab siksikabun salau gusig men. Guzenemen, na salau du naliu daimai, aip i numau. Guzenaimai, gonugau petak ze duailen suban abai maramam. ¹⁶Na polu ze duailen agal dabeleu eiman zeze manem seunab mamam. Ze go nug duailen Uwait waugab i imarai alaneu. Gonug ag igul eg nugau abu ebun marena, ag Uwait utei unamamen. ¹⁷Polu ze go leprosi suig sul gonug enimag unum eg maraneu. Himeneus, zaug Piletus dual ag guzenai polu ze macanemen dudu aliag. ¹⁸Go Uwait nugau petak ze utei wanemen. Go polu ze guzenai ze macanemen, “Kristen duailen agal ze ziwemen ziwes ebun go noumaimai, koli awau asamam, gonun, aiu ses petak pet noumaimai, go koli i asamam.” Go guzenai polu ze macanem, ze go eim duailen ipal agal oiagab petak emen eg maremen.

¹⁹Bo, Uwait nugau duailen ag zau sanag gusig Uwait nug kutai meun sul, sanag go hilo aloi abun iborain tam. Go sanag ebun go nug guzenai sikut wai meun, “Dubanou Ban nugtal gonugau duailen abiu.” *Namba 16:5* Go sikut tub han guzenai weun, “Duaire in go, ‘Iz Dubanou Ban nugau’ aneu, go igul eg macaneu unum utamau.” *Namba 16:26*

²⁰Zau banou tub zaueim mis tebil beu beu darem. Ipal aiwag gol ta, silva ta, go sil patarai memen. Ipal a mui em mui go sil patarai memen. Ecesab go salau beu beu mui darem. Ecesab ipal agal salau banou, ipal agal salau ginampet beu beu. ²¹Guzenaimai, du in go gonugau igul eg ebun uteimai, koli Uwait nugau ameg ebun naliu usalamau, du go gue go tebil salau banou mui sul. Go Uwait nugau ameg ebun naliu usalaimai, igual Dubanou Ban suban isanorabun iboin. Go salau naliu mabun gumei dacaneu.

²²Timoti, silin mogoi ipal agen igul egeg asiu macanemen. Na agal igul eg i sesamoren. Na Uwait nugau ameg ebun naliu dabun salau men. Nait ounab petak emen gusig pataiba, dudu ipal en ounab noumaiba, go abai ounab selai mui suban damam. Duailen ipal ag Uwait nugau ameg ebun tugui daimai, Uwait nug ag isanarabun auranemen, na go abai ereg igul naliu go guzenamam. ²³Bo, na duailen agal dabeleu eim ze ata atai macanemen go abai i ze alalen. Na abiu guzenai ze mai beteimai alalabun igul zumau. ²⁴Dubanou Ban nugau salau du go duailen abai ze eim i alalaneu. Go duailen ebalagab igul unum naliu maimai, go ag abai selai hobo daimai, ag Uwait nugau igul sesamorabun suban abai maramau. Duailen agen go ebun igul eg macanemen, go igul go en ban i

dabilaneu. ²⁵Go duailen inen gonugau ze sesamorabun utanemen abai ougab selai mui daimai, Uwait nugau petak ze iauiou abai maramau. Go guzenai dabeleu, iz igul go guzenemin, Uwait nugau duailen go isanarena, goagal igul eg ebuan koli kekulaimai, gonugau petak ze abe mamam. ²⁶Guzenebi, agal dabeleu koli naliu usalaba, ag Satan nug gonugau igul sesamorabun gusig patareun ebuan uminai unamamen.

Yesus koli alabun ziwas alai ninaba, duailen igul eg beu beu mamamen.

3 ¹Na abe mamam, aiu ses Yesus nug koli alabun ziwas waugab uhu asiu pet ipal zumau. ²Ziwas go ebu, duailen ag agtal en oiagab noumamamen. Ag aiwag asiu wabun aimai dabeleu asiu umamen. Ag agtal agal wanimag ulagwag maimai, agal enimag en siksikamamen. Ag duailen ipal agal enimag ebu eg ze awaramamen. Ag agal memeagar anaiagar agal ze i sesamoramamen. Duailen go ag duailen ipal agen igul naliu ag ebalagab mebi, ag i 'Ese-e' awaramamen. Ag Uwait nugau igul naliu semuramamen. ³Ag duailen ipal en oiagab i noumamamen. Ag duailen ipal en oiagab bisomagar i pimamen. Ag duailen ipal agal enimag ebu ze eg maramamen. Ag agal dabeleu agtal i suban gumamamen. Ag aiag sisilaba, duailen ipal eg maramamen. Ag igul naliu mabun i alamamen. ⁴Ag agtal agal zaiagar imaraimai, agal iwai zaiagar agal ebeagab maramamen. Ag pigai agal dabeleu eg agtal sesamoramamen. Ag guzenai dabilamamen, 'igua dudu banban'. Ag agal enimag siksikabun umkoskos dabeleimai, Uwait nugen oiagab i noumamamen. ⁵Dudu go ag agtal polu ze maimai, ig Uwait nugau salau moroi darem amamen. Bo, agal igul eg sesamoraimai, ag Uwait nugau salau go gusig mui ag abe mab tam. Timoti, na dudu guzeneneg waiagab i dan.

⁶Ailen ipal ag dabeleu gusig tamacag, ag igul eg asiu maimai, igul eg go en uhu asiu gamacamamen. Dudu eg go agen uzan ipal beteimai, guzeneneg ailen agal zaueim simai, ailen go zeze ipal dabuiag pataimai, goagal dabeleu gumabun guzenamam. ⁷Ailen go ag umkoskos ece abiu mabun guzenanem, bo, ag Uwait nugau petak ze abiu mabun iborain tam. ⁸Getal Zanes*, zaug Zambres* dual agen Moses iwai moromen sul, dudu e han guzentel Uwait nugau petak ze dual iwai mamam. Agal dabeleu unum eg weun, ag Uwait en agal oiagab petak ab tam. ⁹Bo, dai dai, duailen unum agen ag kar wagareun uligaraimai, agal ze eg i sesamoramam. Go getal duailen agen Zanes, zaug Zambres dual en kar wagareun uligaremen sul.

Pol nug Timoti gusig ze aureun.

¹⁰Bo, na iz ibail aidaimai, izal igul unum na abe memen. Iz duailen tapaimaranem igul go na abiu. Na iz aidanem igul mui izal dabeleu mui go na abiu. Izal oiab Yesus en petak gusig aimai, duailen ipal oiagab selai

mui isanaranem igul go na abiu. Izal oiab nug duailen en noumaimai, gusig tapai daimai, uhu gamacanem igul go na abiu. ¹¹Dudu agen iz uhu mileimai, iwanem go han na abiu. Antiok uzan, Aikoniam uzan, Listra uzanan dudu agen iz eg milemen go na abiu. Na abiu iz uhu beu beu oimai, gusig tapai daremin. Bo, Dubanou Ban nug iz uhu go beu beu ebuan imacileun. ¹²Petak pet, duair in go Yesus Kristus dual pezai daimai, Uwait nugau igul sesamorabun guzenaneu, go dudu ipal agen uhu muramam. ¹³Bo, polu ze maranemen dudu mui dudu ipal eg mui ag Satan nugau polu ze petak aimai dabeleimai, igul eg asiu pet macanemen. Goagen han duailen ipal ameag patebi, duailen go agal ze petak aimai dabeleimai, sesamoramam.

¹⁴Bo, na, Uwait nugau Ze abe memen, go i uten, suban sesamoren. Na abiu ze go petak pet, einen, na ig duailen iguan ze go abai mizemun na abe migemen. ¹⁵Na mogoi ginampet daremen ebu, alai ulis, Uwait nugau Ze na abe mem. Ze go nug na dabeleu naliu mizena, nait ounab Yesus Kristus en petak emen, gonun, Uwait nug imaizamau. ¹⁶Uwait nugau Ah Wes nugtal Uwait nugau Ze dudu awarina, goagen ze go agau ebu sikut wemen. Ze go nug duailen igul naliu mabun tapaimareu, agal igul eg macanemen abai maraneu, ag koli igul naliu mabun kasaraneu, Uwait nugau ameg ebu ag naliu erunai dabun abai maraneu. ¹⁷Gonun, du in go Uwait nugau salau macaneu, go ze gue sesamoraimai, gonugau salau unum naliu pet mabun iboin.

4 ¹Guzenaimai, Uwait nugau ameg ebu mui Yesus Kristus nugau ameg ebu iz na gusig ze aizem. Yesus Kristus nug duailen noumemen mui duailen awau darem mui sisiaramau. Aiu ses Yesus nug duailen unum gumarabun agal ameagab ebu alamau. Guzenaimai, iz na gusig ze go aizem. ²Uwait nugau Ze duailen awaramam. Ziwas umkoskos ziwas eg mui naliu mui na suban tapai daimai, gonugau ze awaramam. Na duailen polu ze macanemen kasaramam. Duailen go igul eg mebi gusig awaramam. Duailen agal oiagab petak emen gusig tamacag gusig maramam. Na go abai ounab selai mui daimai, igul naliu duailen suban abai maramam. ³Einen, ziwas tub aiu ses zumau ebu, duailen ag Uwait nugau Ze duabun utamamen. Bo, go agal dabeleu eim agal igul beu beu sesamoraimai, polu ze ipal abai maranemen dudu asiu goagen ag waiagab alai gotulabun awarebi, alai gotulebi, goagen agal ze beu beu awaramam. Ag go agal ze doimai, ag siksikaimai, sesamoramamen. ⁴Dudu go ag Uwait nugau petak ze uteimai, ag dudu agal dabeleu eiman gaul iman gingin marena, duanemen. ⁵Bo, na ziwas umkoskos nagtal nait dabeleu suban gumeimai, ein uhu na ebizab zuba, na uhu go gamacamam. Na Uwait nugau Ze Naliupet duailen awaramam. Na Uwait nugau salau du, nait salau unum suban mamam.

⁶Izal noumabun ziwas alai dareu. Dudu ipal agen iz iwebi, noumaimai, izal esep wain ze go Uwait ula dacanemen dudu agen Uwait murabun

gorianemen sul goriamam. Izal unabun ziwas waiab zoi dareu. ⁷Iz Uwait nugau salau suban maimai, unum pocemin. Izal oiab petak emin go utab tam, gusig patai darem. ⁸Mesgai wag ece naliu go Dubanou Ban nug duailel igul naliu macanemen marabun aneun, ulis iz wabun darem. Dubanou Ban nug duailel tuguai sisiaaneu. Aiu ses, duailel sisiarabun ziwas ebu, go nug iz ece go milamau. Bo, izatal tam, duailel ipal ag go koli alabun oiagab siksikai mui gumei darem, ag han ece go umamen.

Pol nug Timoti pigai go waugab alabun ze palautai moroun.

⁹O Timoti, na pigai iz waiab alabun abu peiba alen. ¹⁰Demas go gonugau ougab em e ebuan igul en noumaimai, go iz utilaimai, Tesalonaika uzan beteun. Kresens go Galesia agaig utilai waneun, Taitas go Dalmesia agaig utilai waneun. ¹¹Luk go sag iz ibail dareu. Na alabun aimai; Mak imai alen, einen, go alaimai, iz salau isanilabun iboin. ¹²Iz Tikikus palautina, Epesus uzan beteu.

¹³Na alabun aiba, izal tibur galau huia Troas uzan Karpus nugau zaueim utei alemin, go mui izal agau ipal mui oimai alamam. Guzenaimai, na agau ipal egun galau sil patai memen go mui ereg oimai alamam.

¹⁴Aleksanda, go ecesab *ain bras* sil patai macaneu du go nug iz eg pet mileun. Gonug iz guzenileun, gonun, aiu ses Dubanou Ban nug go koli uhu banou muramau. ¹⁵Gonun, na han du go suban pimam, einen, go igual ze i duaneu, go nug igual ze unum iwai muraneu.

¹⁶Iz amegai sisiaraneu du nugau ameg ebu tapai daremin, du tub nug iz isanilabun seiab i tapai dareun. Iz izaseu tapai daremin. Duailel unum go utilai wanemen. Iz Uwait auremin, ag igul go guzenemen en Uwait nug ag ze a aimai i awaramau. ¹⁷Bo, Dubanou Ban go iz eiman daimai, iz gusig mileun. Guzenina, iz Uwait nugau Ze duailel awaremin, emgasag ipal ebuan duailel unum duabun iboin. Iz egun laion nugau ogusau oug nomin sul, bo, Dubanou Ban nug iz isanilena, dudu agen iz iwena, noumab tam. ¹⁸Petak, du tub nug iz eg milabun ina, Dubanou Ban nug iz umkoskos isanileimai, imailamau. Gonug iz subantal imalei gonugau uzan Mesgai wag simau. Ig gonugau wanib umkoskos ulagwag mab. Petak.

Pol nug gonugau ze poceun.

¹⁹Na izal 'Amban' ze Prisila gamu Akwila dual mui, Onesiporus nugau ug abai ereg awaramam. ²⁰Iz Erastus Korin uzan utei alemin darem. Tropimus go ebeu mui Miletus uzan utei alemin. ²¹Na iz waiab pigai alabun abu peiba, alai peilen. Aiu ses dai dai, go ut malalai ziwas zumau, gonun, na pigai alen. Iubulus, Pudens, Linus, Klodia, agen na 'Amban' ze aizem. Nait zaunar, Uwait nugau duailel, unum goagen han na 'Amban' aizem.

²²Dubanou Ban nug nait wes ibaiz damau. Go gonugau ougab naliu eiman ag unum isanaramau.